



古今之間

這下想愛炊飯抑炊菜，仰般个利便，淨愛摻菜飯放落電鑊肚，倒兜水到鑊底，鑊蓋一掙，開關一掬，就等食咧！在這「開關一掬」之間，逐擺就會恁著頭擺煤飯个時節，係仰般个難，尤其係愛用樵杈起火、燒火，煤滾咧愛泌糜飲，留火屎爛等，愛脛等毋好分佢臭火爛。

記得讀小學个時節，爺哀交代放學轉來愛先煤飯。好天時還較爭，係堵著落雨天該就死無命咧！樵杈溼潤溼潤，起火難著，愛仰結煞？想空想缺，恁著番油當好用。遽遽尋著一支較燥个竹笕破到兩析，擇一析揀兜火灰落去，過倒兜番油，火一點就當猛燒竹笕，黏皮攏兜杈落去，飯就開始煤咧！平常時爺哀省屎省尿，暗晡頭三兄弟讀書，規定僅可點一盞燈盞火共下讀，這下急著咧！打爽一下毋怕啦！阿爸從來就毋知佢會想出這隻孔竅。

泌好飯爛飯，成時好爽，爽到毋記得，飯嘎臭火燒。阿爸做事轉來，鼻著爛味，肚屎當枵，火一掙，闕啊起來，盲食著鑊爛，佢兜「竹筍炒肉絲」就有好先食。好得有上過自然課，先生講火炭做得「除臭」。佢爸係「燒火炭達人」，屋下麼个斯無，火炭當多。鼻著有爛味，煞煞去提幾砵火炭，用字紙墊等，放到飯頂掙等。果然毋會差，等落氣咧，爛味無哩！阿爸食飽，食著鑊爛乜怕香香，哪還會闕？讀兜書還係有用。

「離開胞衣跡，人生仰恁遽？」無試著就七十咧！恁起人一生在這宇宙古今之間，就像大海个一粒粟共樣。心肝肚無「前不見古人，後不見來者。念天地之悠悠，獨愴然而涕下」恁樣，又乜有「今人不見古時月，今月曾經照古人。古人今人若流水，共看明月皆如此」个感覺。恁哩脛著个月光，乜摻李白該量時脛著个月光共樣無變化。

到這下，陳子昂、李白變古人咧，將來恁兜人也會變古人。古今之間，短短幾十年間，變化實在大到無人想得著。飯甌早就變古董，千萬年來用樵火煤飯、烱菜个飯盆頭變電鑊。煤飯毋使泌飯，開關一掬就等飯食，也毋驚會臭火爛。電腦網路發達過後，幾十年做得抵幾下千萬年，煤飯還做得遙控，設定好勢，一轉到屋就有香馥馥个飯好食咧！

開關一掬个一瞬目之間，想著頭擺个辛苦、衰過，這下个生活實在幸福。

作者：徐貴榮

☆詞彙學習☆

【炊菜】cheˊ coiˊ：蒸菜。

【烱菜】koˊ coiˊ：煮菜。

【煤飯】sab ponˊ：煮飯。

【泌糜飲】biˊ moi rhimˊ：昔時以飯鍋煮飯，飯煮熟時，將飯湯濾出來。

【提】te：拿、提。

【脛】ngiangˊ：看。

【爽】songˊ：玩。又說「踐」，音 cienˊ。

【落氣】log hiˊ／kiˊ：食物煮熟或蒸熟後，蒸氣散發後氣溫下降的現象。

【胞衣跡】bauˊ rhiˊ ziangˊ：出生地，意指故鄉。

【該量時】gai liong shi：那時候。

☆文法學習☆

【等（到）……乜怕……】denˊ (doˊ) ……meˊ paˊ ……：等（到）……也可能（恐怕）……。例：等到暗昏，係講無來，較等乜怕無來咧！（等到天黑，若說沒來，再等下去也可能沒來了！）